

**Disputatio chemico-physiologica inauguralis de natura calorici et de calore animalium : quam, annuente summo numine : ex auctoritate reverendi admodum viri, D. Georgii Baird, SS.T.P. Academiae Edinburgenae Praefecti : necnon amplissimi senatus academici consensu, et nobilissimae facultatis medicae decreto : pro gradu doctoratus, summisque in medicina honoribus ac privilegiis rite et legitime consequendis / eruditorum examini subjicit Gulielmo Saunders, Hibernus, Societ. Reg. Med. Edin. Praeses Annuus, necnon, Societ. Reg. Phys. Edin. Praeses Annuus.**

## **Contributors**

Saunders, William, active 1802.  
Baird, George Husband, 1761-1840.  
University of Edinburgh.

## **Publication/Creation**

Edinburgi : Excudebant Adamus Neill et Socii, 1802.

## **Persistent URL**

<https://wellcomecollection.org/works/wy6z2b54>

## **License and attribution**

This work has been identified as being free of known restrictions under copyright law, including all related and neighbouring rights and is being made available under the Creative Commons, Public Domain Mark.

You can copy, modify, distribute and perform the work, even for commercial purposes, without asking permission.



Wellcome Collection  
183 Euston Road  
London NW1 2BE UK  
T +44 (0)20 7611 8722  
E [library@wellcomecollection.org](mailto:library@wellcomecollection.org)  
<https://wellcomecollection.org>

*glaciatione*

---

DISPUTATIO CHEMICO-PHYSIOLOGICA  
INAUGURALIS,  
DE  
NATURA CALORICI;  
ET DE  
CALORE ANIMALIUM.

---

To John Elliot Esq; from  
his friend W<sup>r</sup> Fawcett

DISPUTATIO CHEMICO-PHILOSOPHICA  
INAUGURALIS,  
DE  
NATURA CALORICI;  
ET DE  
CALORE ANIMALIUM:

QUAM,  
ANNUENTE SUMMO NUMINE,  
EX AUCTORITATE REVERENDI ADMODUM VIRI,  
D. GEORGII BAIRD, SS. T. P.  
ACADEMIÆ EDINBURGENÆ PRÆFECTI;

NEC NON  
Amplissimi SENATUS ACADEMICI Consensu; et  
Nobilissimæ FACULTATIS MEDICÆ Decreto;

PRO  
GRADU DOCTORIS,  
SUMMISQUE IN MEDICINA HONORIBUS AC PRIVILEGIIS  
RITE ET LEGITIME CONSEQUENDIS;  
ERUDITORUM EXAMINI SUBJICIT  
GULIELMUS SAUNDERS,  
HIBERNUS,  
SOCIET. REG. MED. EDIN. PRÆSES ANNUUS,  
NEC NON,  
SOCIET. REG. PHYS. EDIN. PRÆSES ANNUUS.

VIII<sup>o</sup> Calend. Julii, horâ locoque solitis.

---

By the collision of different sentiments, sparks of truth are struck out, and light is obtained.

FRANKLIN.

---

EDINBURGI:  
EXCUDEBANT ADAMUS NEILL ET SOCII.


---

1802.

ДИСТАНЦИОННОГО  
УЧЕНИЯ

ОБРАЗОВАНИЯ

МУХАММАД ЯЛОД



Digitized by the Internet Archive  
in 2020 with funding from  
Wellcome Library

DISPUTATIO CHEMICO-PHYSILOGICA  
INAUGURALIS,  
DE  
NATURA CALORICI;  
ET DE  
CALORE ANIMALIUM.

I. *DE NATURA CALORICI.*

CALORICI contemplatio mirè torfit veterum philosophorum mentes unde natæ sunt variæ opiniones supra modum absurdæ, quæ quum jam penitus obsoluerunt haud merentur ut iis discutiēndis nimio studio immoremur. Recentiores autem et saniores philosophi, in duas de natura calorici sententias abierunt; quarum una est calorem, motūs tantummodo effectum esse; altera, fluidum esse materiale.

Insignis VERULAMIUS, qui primus de calore experimentis philosophicis egit, priorem opinionem propugnavit\*. Ille, philosophos qui

A calorem

---

\* In libro parùm vulgari, scripto De forma Calidi.

calorem materiæ cuidam retulerunt, novam ex propriis sensibus substantiam creavisse, observavit; hujusque definitionem tradentes, proprietatem materiæ pro substantia a cæteris diversa sumpsisse. Hanc ob rationem calorem, corporis tantum qualitatem esse opinatus est, et eundem, motui ipsius particulatum undulanti tribuit. Egregius noster philosophus, designatus a natura ad experimenta physica ingeniosissimè instituenda, ROBERTUS BOYLEUS, ad eandem accessit sententiam. Multa experimenta de productione caloris instauravit; ex quibus sic colligit: “In the production of heat there appears nothing on the part of either the agent or patient, but motion, and its natural effects.” Atque dum clavum ferreum, duro impactum ad caput usque ligno, incaluisse conspexit; dicit, “The impulse given by the stroke being unable to drive the nail farther on, or break it, must be spent in making a various, vehement and intestine commotion of the parts among themselves, *wherein the nature of heat consists\**.”

NEWTONUM

---

\* BOYLE on the Mechanical production of Heat.

NEWTONUM eidem sententiæ favere vidi-  
mus ; sed cum solita modestia, assensum suum  
præbet sub forma interrogationis, ut semper  
cùm de rebus dubiis ageret \* : “ Do not all  
fixed bodies, when heated beyond a certain  
degree, emit light, and shine ; and is not this  
emission performed by the vibratory motion  
of their parts ? And do not all bodies which  
abound with terrestrial and sulphurous parts,  
emit light as often as these parts are sufficient-  
ly agitated, whether that agitation be made  
by external fire, or by friction, or percussion,  
putrefaction, or any other cause ? ”

Hanc tamen sententiam, tantis licet viris  
placuerit, alii paulò post impugnaverunt.  
HOMBERG †, an. 1705, sulphur ignem esse  
verum putavit, simulque cum materia ab ini-  
tio extitisse ; et eodem ferè tempore, GRAVE-  
SANDE ‡ et LEMERY § calorici materialitatem  
vindicaverunt. BOERHAAVIUS denique BA-

CONI

---

\* Optics, lib. iii.

† HOMBERG, Essai du Soufre Principe. Mém. de l'Acad. 1705.

‡ GRAVESANDE, Elem. Phys.

§ LEMERY, Mém. de l'Acad. 1713.

**C**ONI sententiam omnino rejicit, ignemque (vel caloricum) fluidum esse elasticum existimavit, ubique diffusum, in frigidissimis æquè regionibus, ac in plagiis terræ calidissimis ; in hisce tantummodo, motum ejus magis esse manifestum \*. Ut hanc opinionem stabiliret, varios calorici effectus in corporibus quibus id inesse putavit, exposuit ; sed ille, æquè ac alii qui eidem favent theoriæ, de ipsius calorici natura nihil enodavit ; veram solummodo historiam corporum, nobis tradidit, quæ calefiunt, lucida ac tenuiora evadunt, atque inflammantur. Nonnullis parvi momenti mutatis, hypothesi huic BOERHAAVII, maximi quidem nominis philosophi, LAVOISIER, BLACK, IRVINE, MORVEAU et CRAWFORD, favent. Caloricum omnes definiunt esse fluidum quod cætera corpora attrahunt ; suis particulis eodem tempore mutuo se repellentibus. Secundum hanc theoriam, calor corporum a quantitate hujus fluidi in iis existentis pendet ; et hanc eorum temperies indicat. Æquilibrium verò temperiei, quod, ignota illa materia quam vocant Caloricum, semper tenet, a vi repellente

---

\* BOERHAAVII Elem. Chymiae, lib. i.

repellente quâ docent ejus particulas præditas esse, simul cum pluribus aliis effectibus, explicatur. Huic hypothesi, tot præclaris viris sustentatæ, multi philosophi jam assentiunt.

Scio quâm arduum sit juveni, ad Philosophorum opiniones refellendas conari. Magnorum hominum auctoritas nugas saepe in res magnas vertere videtur, et novis, et inauditis, contra tantas opiniones, auctoritatem aliquam conciliare, et stabilire, difficillimum est. Quoniam autem veritas per examen infirmari non potest, duas jam dictas theorias discutiam.

De prima opinione, (calorem scilicet motum esse, vel in motu quodam particularum corporum consistere), notandum est, motum plurima efficere, sed quibus legibus aut modis, calorem, minimè constat. Hanc hypothesin philosophi moliti sunt, quoniam, calorico materiale esse concessò, pro calore in frictione generato nullam rationem reddere potuissent.

Hoc tamen, ut logici loquuntur, argumentum solummodo ad ignorantiam est, theoriæ ideoque contrapositæ veritatem directè non probat.

bat. Quomodo motus corpora expandere possit, non modo ex BACONI verbis et principiis explicatu, sed immo conceptu, difficile est.

Altera theoria, scilicet calorem fluidum esse materiale, plures habet fautores, ac hominum præjudiciis melius congruit, quæ vincere labor verè Herculeus est: etenim, sicut dicit HELVETIUS, “ Toute idée trop étrangère à notre manière de voir, et de sentir, nous semble toujours ridicule. Nous n'estimons jamais que les idées analogues aux nôtres, parceque nous sommes dans la nécessité de n'estimer que nous dans les autres.” Ob hanc rationem, et quoniam nostra calorici cognitio non nisi per sensuum testimonium obtineri possit; an fint ulla argumenta, caloricum fluidum esse materiale, metaphysicè scrutabor: ut enim verbis Doctoris HUTTON utar, “ The science of metaphysics is alone capable of judging with regard to the principles that are employed in the other sciences; because it goes to examine how we come to know those truths, by which in reasoning scientificaly we proceed to increase our knowledge \*.”

Caloricum,

---

\* HUTTON's Nat. Philosophy.

Caloricum, sensibus nostris veluti principium aut elementum ab aliis corporibus separatum, exhiberi nequit; dotes ejus cum corporis in quod agit dotibus necessariè conjunguntur.

“ So far from having *it* in our power (inquit FOURCROY) to insulate it, we cannot form an idea of its separate existence, and notwithstanding the advanced state of chemistry it has not been possible to seize and confine this *principle*, which philosophers seem agreed to call a *fluid*, and whose effects they explain with sufficient facility, when, led by custom, they regard its existence as well established\*.” Ex quibusdam mutationibus, quas corpora a causis manifestis subeunt, quæque, diversas nunc sensus ac antea nobis imperitiunt, de calorici existentia ejusque effectibus judicamus. DES CARTES, MALEBRANCHE, LOCKE, et REID, calorem qualitatem esse corporum secundariam afferunt; nullamque substantiam iis inesse, sensibus nostris caloris similem.

Calorem tantum qualitatem esse sensibilem materiei, vix alicui qui rem perpendet, in dubio

---

\* THOMSON’s Fourcroy.

bio erit. Quid experimur cùm nosmet calere dicimus, nisi placidam sentienti voluptatem? Quid experimur quando nosmet uri dicimus? nisi ingratum sentienti dolorem. Poffuntne hi sensus in exanime substantia existere? Qui sic credat, non magis absurdè loquitur, quām qui dolorem acie gladii ineffe existimat, quia ad excitandum dolorem opportuna est. Porrò, immittatur manus utraque, altera calida, altera frigida, in vas aquæ plenum; aqua alteri grātē calida, dum alteri ingratē frigida erit. Sed impossibile est, ut hæ diversæ conditiones in eadem substantia, eodem temporis puncto, insint. Attamen, si attentiūs exploremus ipsam caloris notionem, facilè percipimus, voce hāc plerosque notare homines, sensum quendam impressum animo suo, quoties organa sentiendo dicata, mutantur ab igne illis applicato. Sed in illa notione neutiquam innotescit menti, vel actio ignis, vel mutatio sentientis instrumenti in corpore; quare calor quatenus ab intelligentia nostra sentitur, unde solū et hoc nomen habet, nihil indicat corporeum; meram tantūm cogitationis percipientis mutationem efficiens. Alicui quidem calescenti

clara

clara est, et distincta, hujus sensus species ingenita, veruntamen anne inde unquam dabitur assequi quidquam de calorico, vel de corpore mutato per caloricum?

Calor, Dr HUTTON notat, quatenus res externa, qualitas tantum corporum est, ita ut calorem prout effectum solummodo, non causam cognoscamus. Sensum istum quem corpora caloricum diffundentia nobis impertuntur, calorem appellamus, relativè nimirum ad nosmet ipsos, seu ad alia corpora quæ, nostri sensus quia diversè afficiuntur minus calida esse docent. Sed nostra caloris sensatio, æquè proculdubiò a causa hanc excitante, differt, ac dolor a gladio seu ipecacuanha ab nausea. Quamvis verò absurdum certè fit, ullam inter hæc similitudinem existimare; ita tamen qui calorici materialitatem defendunt, in hanc incidunt absurditatem. Fluidum universale, subtile, atque igneum, ex suis sensibus efformârunt, effectus suos pro ratione quantitatis producens; atque mirâ profus fiduciâ de ejus existentia loquuntur. Mihi quidem videretur haud minus sapienter eum loqui, qui dolore affectus, fluidi dolorifici ubi-

que diffusi existentiam propugnaret. Si membra nostra anaesthesia laborassent, vel corpora omnia sensibus prædita omnino deleta essent, nec dolor nec calor remanerent; ideoque nec unus nec alter existere potest nisi in mente eos percipiente. Non negamus thermometrum affici, quamvis omnia corpora sensibus prædita omnino deleta essent. Sed hoc, potestati quam habet materia inter se agendi attribuimus (ut fisius paulò post monstrabimus), et non fluido subtili. Nunc videamus an physicè hanc materiam hypotheticam investigando, existentia ejus evidentior evadat.

Qui caloricum fluidum esse materiale docuere, effectus suos activos nisi ad speciem materiæ peculiarem nequaquam attribui potuisse, præviderunt. Hujus igitur materiei particulis, vires repulsivas tribuerunt; atque, mirabile dictu! omnia ejus phænomena felici hac qualitate explicantur; ita ut materiam ipsam vel prorsus negligant, vel ad vires repulsivas passivè sustinendas, hanc formatam esse, putant.

Si caloricum materia esset, lis inter philosophos de natura ejus, jamdiu judicata esset,

cum

cùm materiæ characteres qui omnibus hominibus noti sunt exhiberet. Attamen instrumenta nostra accuratissima, pondus ejus metiri nequeunt: Observationes nostræ, docent attractione gravitationis, vel cohæsionis, id non regi, neque etiam legi chemicæ attractio-  
nis, cum dotes ejus, licet cum corporibus con-  
jungatur, immutatæ maneant; cùmque corpo-  
ra calefacta ab hac combinatione, caloricum  
suum iterum sine ulla mutatione suarum par-  
tium amittunt. Rogabo, an omnes hæ qua-  
litates negativæ materiam denotant? Mate-  
riam sine his, æquè difficile, ac corpus sine  
figura, concipere videtur.

Colorici per vacuum *Torricellianum* diffusio,  
ejus existentiam probare dicitur; sed quo-  
modo non mihi liquet. Si caloricum fluidum  
materiale esset, thermometrum quod in vacuo  
stet, et citius et magis affici debet, quām si  
in aëre positum esset; nam nulla adest sub-  
stantia, quæ calorem ingressum, vel abforbe-  
ret, vel ejus accessum ad thermometrum co-  
hiberet. Comes autem RUMFORD ex expe-  
rimentis invenit, aëre admisso easdem muta-  
tiones ac in vacuo, in tertio temporis parte,  
thermometrum

thermometrum indicare. Fluidum igitur æthereum quod expelli nequit, quodque vibrations in vase excitatas thermometro communicat, adeste arbitratur.

Argumenti autem gratiâ, materialitatem calorici concedamus. Quonam in statu in corporibus existit? Si chemicè cum his conjungitur, priores suas proprietates omnino mutare, alioque in statu existere, debet; ita ut præter id quod in chemica combinatione tenetur, plus calorici existere nequeat, nullumque ideo fluidum universale igneum in natura erit. Rursusque, si corpora calorico repleri dicuntur tantum pro eorum capacitatibus, tunc orbem universum calorico circumdari ut credamus necesse est. Re sic se habente; ut inter specificum, et absolutum, corporum caloricum, proportio semper effet, oportet; et etiam ut specificum et absolutum caloricum semper effet inversè ut corporum densitas vel gravitas\*. Tantum verò a re ipsa

---

\* Vox Calor Specificus idem significat, ut vox *capacity for caloric.* Calor Specificus est ea calorici quantitas, quæ pluribus ejusdem ponderis corporibus ad eandem temperiem calificiendis sufficit.

ipsa hoc abeft, ut ferrum, cui gravitas specifica multò major quām ftanno eft, capacita- tem pro calorico bis majorem habeat; et idem de multis aliis corporibus verum eft. Si ad hanc evitandam objectionem dicatur, caloricum peculiates pro quibusdam, magis quām aliis corporibus attractiones habere, hypothesis, hoc fluidum eſſe tenuiſſimum re- nunciatur, fluidorum enim attractiones pro corporibus, quantum ſcimus, ut corporum gravitates vel densitates ſunt. Hoc clariflīmè RUMFORD exponit: verba ejus hæc ſunt: “ If calorific be a fluid, heat must be occaſioned either by its accumulation or increased action. Now, the accumulation of a fluid can take place only according to the capacity of the containing thing; fo that heat ſhould be stronger in the rarer ſubſtances; which is not true. If it be from an increased action of the fluid, then the action is the firſt caufe; which is begging the question \*.”

Philosophus hicce, cui nunquam hypothesis supradicta arridebat, cum Societate Regia ex- perimenta quædam ingeniosè instituta, ad cal-

oris

---

\* RUMFORD's Essays.

loris frictione excitati causam detegendam, communicavit. Ex his constat, philosophos antea errasse, calorem ex frictione generatum, diminutioni capacitatis, tribuendo; nam nec particulæ metallicæ in ejus experimentis ex mappa metalli jam divisæ, calcinatae fuere, nec earum capacitates minores a frictione redditæ fuerunt. In quodam experimento, apparatus suum sub octodecim libris aquæ posuit, quæ duabus horis ac dimidiâ ebullire viva est; quod vix effectum esset, ut putat, ex combustione novem candelarum cerearum, quarum singula diametro pollicis  $\frac{3}{4}$  pars esset. Nulla est origo, secundum theoriam horum qui ex materialitate caloris omnia ejus phænomena exponunt, pro magna temperie hoc experimento producta. Substantiæ quæ circumjacebant, ad caloricum ministrandum parùm idoneæ fuerunt; cum caloricum impertire, et eodem tempore idem ex eodem corpore recipere non possent; nec aqua decompositionem passa est. Neque fluido electrico calor tribuendus est; nam omnia corpora in experimento adhibita, deductores optimi fuere, atque ideo nullum electricum

ad

ad excitationem aderat; et si quævis apparatus pars hoc munere fungeretur, deductio prius propter calorem fierit, quam electricitatem necessariam ut aqua bulliret, concitaret; et tunc sublatâ causâ, cessaret effectus.

Forsitan horum experimentorum sola expositio, omnibus quorum mentes prejudiciis vacuae sunt, sufficiet, ut in dubium calorici materialitas vocetur. RUMFORDIUS tamen pergit notare, quod, quidquid a corpore quolibet a cæteris omnibus diviso suppeditari in perpetuum possit, substantia materialis nequit esse. Et mihi quidem videtur, ad probandam quantitatem ullam materiei esse infinitam, ostendi oportere partem aliquam, finitam, homogeneam, in ea infinitatem continere. RUMFORDIUS denique ex suis experimentis hanc conclusionem facit: “ I think it extremely difficult, if not quite impossible, to form any distinct idea of any thing capable of being excited and communicated, in the manner the heat was excited and communicated in these experiments, except it be *motion.*” Hoc forsan ab experimentis suis deduci potest; hic tamen propositio, argumentis

mentis parùm nixa videtur. Antea notatum fuit, calorici effectus a motu explicari non posse; et mihi quidem certum videtur, nullum fluidum igneum (vel caloricum) existere. Frustrà ad phænomena explicanda adhibetur id, quod nec sensibus patet, nec ratione intelligi potest. Investigationibus suis finem RUMFORDIUS ponit, quærens, Quid caloricum sit? Quæstio hæc me priùs de hac re quædam scribere induxit, donec, ex sequentibus argumentis, ad explanationem quendam calorici naturæ, directâ ratiocinatione, delatus eram.

Inter Philosophos jam convenit, materiæ particulas simul ita vi attractionis conjungi, ut mentibus nostris soliditatis ideam imprimant. Äquè etiam patet alicui rem perpendenti, hasce particulas nunquam absolutè se invicem tangere. Hoc ex multis aliis argumentis probatur, quàm ex sequentibus, quæ, quoniam vereor ne prolixus sim, tantùm adjiciam.

Quàm facilè, quàmque velociter, fluidum electricum per corpora densissima se diffundit! Quàm facilè lux per corpora quæ inter solidissima

diffima numerantur, semper transit! Speculi optici focus, quo folis radiorum denitas ter millies major fit, cyathi aquæ molem non auget. Idem observamus, si quædam fali quantitas in aqua solvatur. Hydrargyrus in poris vel argenti, vel auri, existere potest; atque hydrargyri et argenti mistura, plus ponderis habet, quam mole æquali alterutrum horum. Cupri etiam ac stanni mistura, (hujus non obstante specificâ levitate,) multò magis quam cuprum pendet. Hæc omnia clarè demonstrant, materiæ particulas in contactu mathematico nequaquam esse. Alia plurima phænomena nobis indicant, particulas materiei vi repulsivâ quâdam separari, quæ, (ut varia naturæ phænomena peragerentur), vi attractionis resistat. Aquæ guttam super plantarum folia, longè a superficie labi, experimenta optica demonstrant. Acus, vel aliæ leves substancialiæ metallicæ, super aquam sustinentur, ac madida nihilominus non fiunt. Muscæ etiam super aquam ambulant, pedesque tamen non madefaciunt. Oleum cum variis fluidis misceri nequit. Lamina argentea quæ rori de cœlo cadenti exponitur, madida nequaquam

fit. Argumenta plurima philosophica satè indicant, vi maximâ opus esse, ut corpora se invicem absolutè tangere cogantur. NEWTONUS ostendit, radios lucis, ad certam distantiam a corpore quod eos reflectit, nunquam non affici. Phænomena electrica clarè indicant, vim magnam necessariam esse ut catenæ annuli sese absolutè tangant.

Hæc omnia satè quidem probant, partes materiæ parvas, æquè ac massas majores, vi repulsivâ sicuti vi attractionis affici.

YOUNG Soliditatem esse *vim resistentiæ* afficit, atque corporum *essentiam* nihil aliud esse quam *vim* ex argumentis deducit \*. At si ipsis opinionibus, et paradoxis assentire aliquibus non visum fuerit, indubitatum tamen est, ut opinor, materiæ particulas vi repulsivâ æquè ac attractivâ præditas esse.

Insignis NEWTONUS jam senex, attractionis et repulsionis vires, materiæ essentiales esse, suspicari incepit, ut ex variis tertii Opticorum libri locis colligimus. De magna corporum

---

\* YOUNG's Essay on the Powers and Mechanism of Nature.

porum expansione, cùm gaseosa vi calorici deveniunt, agens, dicit, " Which vast contraction and expansion seems unintelligible, by feigning the particles of air to be springy and ramous, or rolled up like hoops, or by any other than a *repulsive power.*" Postquam varia ad vis hujus existentiam probandam argumenta affert: " And thus (inquit) nature will be very conformable to herself, and very simple, performing all the great motions of the heavenly bodies by the attraction of gravity, which intercedes those bodies, and almost all the small ones of their particles by some other *attractive and repelling powers* which intercede the particles \*." Aliquanto autem inferius, ubi corporum mutationes ad varias particularum permanentium separationes, conjunctiones, atque motus, refert, sic habet: " It seems to me farther, that these particles have not only a vis inertiae, accompanied with such passive laws of motion as naturally result from that force, but also that they are moved by certain active principles, such as

is

---

\* NEWTON's Optics.

is that of gravity, and that which causes fermentation, and the cohesion of bodies.” Hæc quæ NEWTONUS suggererat, nullorum attentionem arripuerunt, donec celeerrimus BOSECOVICHUS sequentem illius observationem, attentione dignissimam putavit: “Quod ex phænomenis naturæ duo vel tria derivare motus generalia principia, et deinde explicare, quemadmodum proprietates, et actiones rerum corporearum omnium ex ipsis principiis consequantur, magnus esset factus in philosophia progressus.”

In libro admodum ingenioso, hic philosophus egregius novam prorsùs naturalis philosophiæ theoriā proposuit \*. Ad hanc formandam inductus est, ex consideratione *legis continuitatis* †, quam ex physicis et metaphysicis argumentis, universam esse, et nunquam in natura infringi, probat. MACLAURINUS sagax, qui olim in hac Academia scientiam

\* Theoria Philos. Naturalis.

† Continuitatis lex, in hoc sita est, ut quævis quantitas, dum ab una magnitudine ad aliam migrat, debeat transire per omnes intermedias ejusdem generis magnitudines.

tiam mathefios excoluit, videt immediatum contactum cum lege continuitatis conciliari non potuisse. Sed cum aliis philosophis de corporum immediato contactu consentiens, hanc legem deseruit, et infregit. Aet Boscovichus ipsam continuitatis legem aliquanto diligentius considerans, et fundamenta quibus ea innititur perpendens, arbitratus est, illam omnino e natura submoveri non posse, qua proinde retenta, contactum ipsum immediatum submovendum censuit in collisionibus corporum. Consectaria dein persequens, quæ ex ipfa continuitate servata, sponte profuebant, directâ ratiocinatione delatus est, ad sequentem virium mutuarum legem, vel, ut dici potest, ad theoriam ipsam; quam breviter tantum exponere nobis licet.

Secundum hanc theoriam, prima elementa materiæ sunt puncta prorsùs indivisibilia, et inextensa, a se invicem distantia aliquo intervally; quod minui, sed penitus evanescere non potest. Hæc puncta habent singula vim inertiae, et præterea vim activam mutuam, pendentem ex distantiis, et iis mutatis, mutantam, juxta generalem quandam omnibus communem

communem legem. Lex autem virium est ejusmodi, “ ut in minimis distantiis sint repulsivæ, atque eò majores in infinitum, quò distantiae ipsæ minuuntur in infinitum, ita ut pares sint extinguendæ cuvis velocitati utcunque magnæ, cum qua punctum alterum ad alterum possit accedere, antequam eorum distantia evanescat ; distantiis verò auctis minuuntur ita, ut in quadam distantia, per quam exigua, evadat vis nulla : tum adhuc aucta distantia, mutentur in attractivas, primò quidem crescentes, tum decrescentes, evanescentes, abeuntes in repulsivas ; eodem pacto crescentes, deinde decrescentes, evanescentes, migrantes iterum in attractivas ; atque id per vices in distantiis plurimis, sed adhuc per quam exiguis \* ; donec, ubi ad aliquanto majores distantias ventum sit †, incipient esse perpetuò

\* Hæ mutationes suprà expositæ, ad distantias insensibiles intra puncta materiæ positas, pertinent. BOSCOVICHUS enim nullam punctorum contiguitatem admittit possibilem.

† Nempe, ad eas distantias sensibus nostris percipendas.

perpetuò attractivæ, et ad sensum reciprocè proportionales quadratis distantiarum, atque id vel utcunque augeantur distantiae, etiam in infinitum, vel saltem donec ad distantias deveneatur omnibus planetarum, et cometarum distantiis longè majores :” Atque in hoc Newtoniana generalis gravitas consistit. Hujus vis mutuæ, variatæ secundum distantias, imaginem esse in elastris BOSCOVICHUS monstrat. Duæ elastri cuspides has mutationes, secundum punctorum distantias, exhibent, quando conantur ad se invicem accedere, vel a se invicem recedere, prout sunt plus justo distractæ, vel contradictæ. Argumenta quibus BOSCOVICHUS suprà traditam theoriam tuetur, vix quidem neganda sunt. Qui legem continuitatis, (quâ deducitur hæc theoria), negant ; in eandem absurditatem incident, ac si dixissent, idem corpus, duobus locis, in eodem punto temporis, existere posse. Peringeniosus ROBISON hanc theoriam (ut audivimus) colat. Et inter Britannorum philosophos, vires et attractivas et repulsivas PRIESTLEY et MICHELL materiei tribuunt. Ex his viribus naturam

naturam caloris, licet ab nullo alio suscepitam, exponere non dubitamus \*.

\* Postquam sequentia de natura calorici ex argumentis præmissis, et ex theoria Boscovichiana deduxeram, admonuit me quidam his rebus peritus, Dominum DAVY theoriam huic similem tradidisse. Illico theoriam DAVY perattentè legi, et nosmet inveni rem protinus diversè tractavisse. Quamvis verò in hoc consentimus, nullum tale fluidum ut caloricum in natura existere, tamen in nostris expositionibus de causa caloris, et argumenta nostra sunt protinus diversa, et ex diversis naturæ phænomenis ducta, et diverso modo patescēta; ut alicui utrasque theorias legenti exemplo appareret. Dom. DAVY ita calorem definit: "Heat may be defined a peculiar motion, probably a vibration, of the corpuscles of bodies tending to separate them. It may with propriety be called the *repulsive motion*."—Ego nihil scio de *motu repulsivo*; sed tale principium ut *vis repulsiva* inter particulas materiæ inesse, quemadmodum *vis attractiva*, ex argumentis quibusdam conatus sum probare. At non puto hanc potentiam *motum* designare, quamvis motus causa fieri potest; nihil amplius ac attractio, quæ etiam potest motus causa fieri inter duo corpora. Denique, definitio quæ nobis de calore offerre placet, hujusmodi est, quem causâ majoris perspicuitatis, Anglice tradem: Heat I would define to be the joint effect of the antagonising powers of the particles of matter, *attraction* and *repulsion*: The latter of which, induced to act by an external cause, terminates in the partial or total extinction of the former. Heat, then, may be supposed to arise from that *nexus* made by the repulsive power to over come that of attraction.—Liceat mihi nunc ad-  
jicere,

In rebus præmissis particulæ materiei, monstrantur coniunctione simul teneri, vi attractivâ, dum eodem tempore, vi repulsivâ in mathematicum venire contactum vetantur. Hæ vires, ut notat BOSCOVICHUS, instanter invicem mutantur; ita ut quidquid disjungere corporis alicujus particulas tendit, has vires excitat et hanc inducit actionem, quam philosophi Vibrationem vocant. Calor, vel impulsu mechanico, vel chemicâ decompositione, vel combustionē, gignitur\*. Hæ omnes causæ in particulis materiei vires repellentes et augent et excitant, motus vibrationis concitatus est, et corpus, his causis auctis, atque eodem tempore, vi particularum repellente ex his partim pendente, magnitudine tumet. Quando hæc vis repulsiva augetur, formam et texturam corporis delet; et tunc nostra corpora sensibilia adoriens, in his tales inducit motus, quales et facultatem sentiendi, et denique

D

mentem

---

jicere, me hanc dissertationem scripsisse, antequam theoria Domini DAVY mihi nota fuit.

\* Vide quid de combustionē dicitur in secunda hujus dissertationis parte: illic monstratur, combustionē, eodem ferè modo ac mechanicum impulsū, calorem gignere.

mentem potentissimè afficient, et hunc sensum, qui assensu hominum calor vocatur, producet. Sensus acutus nulli melius tribuitur causæ quām tali potestati in organa nostra impetum facienti; nam si materies viribus vacua esset, ad operandam in sese vel ad ideas nobis imprimendas parùm idonea esset; et vis repulsiva satis superque ad texturam corporis solidissimi delendam, si in nostra organa supra modum adhibetur similes ederet effectus. Quando manus nostras inter se fricamus, calor in iis gignitur, sicuti in alioquoque corpore materiali; et propter easdem vires. Quæ sint causæ efficientes, attractionis et repulsūs, meditatione tantūm et ratiocinio, e tenebris quibus involvuntur erui possunt, et aliquatenus cognosci. Spectat autem ad philosophiam primam seu metaphysicam de iis agere. Sed principia talia revera existere, ostendunt phænomena naturæ, licet ipsorum causæ quæ sint, nondum fuerit explicatum.

Nunc perpendendum est, si hæc quam tradidimus theoria, omnes hos effectus qui hactenus ad fluidi ignei operationem apponebantur, explicaret, viz. Expansio, Fluiditas, et Evaporatio.

EXPANSIO.

EXPANSIO.—Quomodo expansio secundum nostram theoriam efficitur, patet ex antea dictis. Qui ad materialitatem caloris ut hunc effectum explicarent configuiunt, in nihilo a me dissentient, nisi quod ope alterius substantiae accidere volunt, quod ego sine aliqua substantia intercedente oriri assero. Illi itaque novam speciem materiæ formaverunt, ut ex hac eam potestatem obtineant, quam ego ex variis argumentis ad omnigenam materiam pertinere monstravi; quo facto, hanc philosophandi regulam, quam philosophia vera colit, temerè infregerunt, nempe, *Entia non sunt multiplicanda absque necessitate*. Discimus ex experientia et observatione, materiem et afficere et affici opportunam esse, atque hoc intelligimus ope sensuum, nullâ ratione habitâ veræ sedis virium, vel potentiarum activarum, aut caufæ realis cui insunt. Si aliquis dicat has potentias involutas esse in subtiliori materie, nullam explanationem affert; nam ab illo rursus quærendum est, ut ab indocto Indico, qui terram, tergo magni testudinis, sustentatam esse dixit.

FLUIDITAS.—Secundum theoriam Boscovichianam

cham quam amplectimur, particulæ diverso quodam modo dispositæ, habere possunt diversas virium summas in iisdem etiam centrorum distantiis, ut aliæ se attrahant, aliæ se repellant. Fluida autem passim non utique carent vi mutua inter particulas, immo pleraque exercent; et aliqua satis magnam repulsivam vim, ut aér, qui ad expansionem semper tendit; aliqua attractivam, et vel non exiguum, ut aqua; vel etiam admodum ingentem, ut hydrargyrus, quorum liquorum particulæ se in globum etiam conformant mutuâ particularum suarum attractione, et tamen separantur admodum facile a se invicem maiores eorum massæ; ac aliquot partibus motus facile ita imprimitur, ut eodem tempore ad remotas satis sensibilis non portendatur; unde fit ut fluida cedant vi cuicunque impressæ, ac cedendo facile moveantur; nam motus particularum circa particulas liber est, ob earum uniformitatem, quæ ut separentur aliæ post alias facile permittit. Ex hinc exponere inducimur, quid corporum *capacitas* significat. Vox *capacity*, in chemiam a Doc-  
tore IRVINE introducta, hactenus multorum phænomenorum

phænomenorum enodationi cum mira sagacitate accomodata est. Sunt qui dicunt, corpora minorem vel majorem calorici copiam continere, secundam *suas capacitates*; sed mihi videtur has voces veram rei imaginem nihil melius effingere, ac si dixissent, corpora, quantitates calorici vel mayores vel minores continere, quia eas continere possunt. Capacitates solidarum minimas esse prædicuntur; in fluida mutata, mayores fiunt; et in gafia conversa, maximæ evadunt. Si caloricum ex viribus materiæ prædictis oriri habitum sit, quæ has diversas mutationes producunt; tunc quæ de capacitatem in his mutationibus observata sunt, intelligi possunt. Solida ex fibrofa textura, et figuris irregularibus formata, ita inter se connexa sunt, ut quemlibet aliquot particularum motum sequantur reliquæ; promotæ, si illæ promoveantur; retractæ, si illæ retrahuntur. Solida non nisi tota simul moveri possunt, et viribus impressis idcirco magis resistunt. Itaque vi repulsivâ (calorico) in tali corpore agente, ubi magna vis attractiva vincenda est, sensiliores ederet effectus, quam si in fluidis egisset, quibus particulæ

particulæ sphæricæ sunt, et paribus a centro distantiis homogeniæ, ut nimirum vires dirigantur ad centra, et motus quidem unius particulæ circa aliam omni difficultate carebit, et vires mutuæ solùm accessum vel recessum impediunt; quibus fit ut vim aliquam ad alia corpora quæ non sint fluida difficilè impertirentur.

CONDITIO ELASTICA — fluidorum, est ea quâ capacitates majores evadunt. Qui hanc conditionem ex fluido igneo induci credunt, tantùm de viribus ejus repellentibus loquuntur. Sed secundum theoriam quam exposuimus, nulla est necessitas, cur novum fluidum fingamus, causâ hujus potestatis, quam omni materiæ tributam esse putamus. Ad conditionem gafis elastici inducendam, vires attractionis debellandæ sunt, particulæ extra limites cohesionis abeunt; et propter ordines relativos quibus positæ sunt, a se invicem recedere coguntur, a viribus suis repellentibus; quin imo externa vi opus est ad continendum in eo statu massam ejusmodi, uti aërem, gravitas superioris atmosphæræ, continet. Non mihi difficilior intellectu videtur, quomodo

corpus

corpus in conditione elastici gafis sustinetur, viribus suis repulsivis; quām ut idem formā solidā paulò ante sustentum fuit vi attractionis; æquè philosophicum est, tribuere illam formam, materiæ viribus repulsivis, ac hanc formam, materiæ viribus attractivis. Ex nulla theoria hactenus prolata enodari possunt hæc miranda quæ subitò ex detonatione et deflagratione oriuntur: nam secundum doctrinam materialitate caloris fundatam, ut frigus loco caloris habeamus necesse est, propter auctam capacitatem; et quoniam ex eadem doctrina tantò major est vis uatoria, quò quantitas caloris major est; unum granum argenti fulminantis contineat tantùm caloris, quantùm multi uncii carbonis vel alias substancialiæ inflammabilis. Hic loci deficit etiam BACONI theoria, quæ, ut motus producat calorem, requirit eundem dirigi in partes corporis; sed quomodo hic motus subitò easdem partes sejungeret, non constat. Hæ difficultates evanescunt, si calor concedatur oriri ex repulsiva vi materiæ. Is ingens motus particularum in detonatione, et deflagratione, fit per vires mutuas inter particulas, quæ erant

in

in æquilibrio, sed quo æquilibrio destructo, aut mechanico impulsu, aut scintillâ accedente, agitatio in mappa oritur, quâ brevissimo tempore particulæ extra limites cohæsionis impulsæ sunt, et cum ingente vi repulsiva et velocitate tunc a se invicem discedunt. Hac mutatione subitò factâ, corpora propinqua et afficit, et caloris sensum cuicunque adstanti dat.

Universalitas caloris æquè ex theoria suprà tradita, ac ex Boerhaaviana effluit. Ubiunque corpus existit, hæ qualitates quæ calorem dignunt etiam adsunt. Ex recentioribus aliqui sunt in ea opinione, ut putent motum neque destrui, nec de novo gigni posse, sed eandem semper motûs quantitatem permanere ; et idem forsan de viribus repulsivis et attractivis materiæ, verum est. “ Omnia enim corpora (dicit SPINOZA) ab aliis circumcinguntur, et ab invicem determinantur ad existendum et operandum, certâ ac determinatâ ratione, servatâ semper in omnibus simul, hoc est, in toto universo eadem ratione motûs ad quietum \*.”

HIS

---

\* Opera Posthuma, Epist. xv.

His rebus, de natura calorici, præmissis;  
nunc de Calore Animalium oportet ut tracte-  
mur.

---

## II. DE CALORE ANIMALIUM.

POTESTATEM, qua spirantia animalia præ-  
dita sunt uniformem ferè temperiem susti-  
nendi quicunque sit circumcingentis medii  
calor, et antiqui et hodierni mirantur. Hæc  
potestas variis et dissimilibus causis, viz. me-  
chanico attritui, fluidi nervosi energiæ, fer-  
mentationi, principio vitali, &c. attributa est:  
nam antequam mutatio qua et aër, et corpora  
combustionem adjuvantia, subeunt, animos  
philosophorum in se convertit; phænomena  
combustionis tam atra caligine immersa fu-  
erunt, ut nemo ex hoc fonte animalium ca-  
lorem exponere ausus est: sed ex quo tem-  
pore arcana hujus processus clariori luce ef-  
fulserunt, hæc in animale corpus philosophi  
exemplo transtulere ad ejus calorem faci-  
endum, qui nunc ex respiratione pendere ab  
omnibus agnoscitur.

Celeb. PRIESTLEY inter primos credo innotuit, sanguinem magnam phlogisti quantitatem continere; cuius ex præsentia, colorem fuscum, ex absentia, colorē floridum obtinet; nam quando sanguinem aëri puro objecit, aëra phlogisto onustum esse invenit, sanguine eodem tempore latè erubescente; et e contrario, eundem, aëri impuro expositum, nigrescere conspexit. Ex quo phænomeno tantūm sequentia colligit: “That one great use of the blood must be to discharge the phlogiston with which the animal system abounds, imbibing it in the course of the circulation, and imparting it to the air with which it is nearly brought into contact in the lungs; the air thus acting as the great menstruum for this purpose\*.” Cl. BLACK, qui novis inventis chemiam locupletavit, primus quæ ad combustionem in pulmonibus spirantium spectant notavit. Pro aëre dephlogisticato in pulmones inspiratione recepto, acidum carbonicum facili experimento expirari detexit. Per tubum curvum vitreum, paullum

---

\* Experiments on Air.

Iulum aquæ calcis continentem, inspirans, nihil mutationis in aqua conspexit; sed cùm per eundem tubum efflavit, aqua subitò turbida fieri et sedimentum deponere visa est, propter acidum carbonicum a calce absorptum. Ex hoc, combustionem inter oxygenium inhalatum et corpus inflammabile in pulmonibus accidere judicabat; calor verò in his, hoc modo liberatus, secundum ejus opinionem ad diversas et remotissimas corporis partes, quasi ex foco diffunditur \*.

Ad hanc sententiam funditus evertendam, pauca tantùm perpendenda sunt. Si calor totius corporis combustionē in pulmonibus evolveretur, tum adeò calerent, ut eos et sensu carere credamus, et ex substantia non inflammabili fieri, alioquin tanto calore brevi penitus destruerentur. At pulmones sensibilitate et irritibilitate præditos, et propter hoc multis et haud parvis injuriis obnoxios esse, neminem latet: Experimentis etiam probatur, eos non majore calore frui in statu fano, quam quævis alia corporis pars, quamvis ab iis

---

\* Dr BLACK, hæc in suis prælectionibus chemicis, tradidit.

iis longius distans; atque porrò bene notum est, sinistrum cordis ventriculum non majorēm habere calorem quām dexter ventriculus, quod prorsū impossibile foret, si calor totius corporis in pulmonibus evolutus esset.

Dom. LESLIE phlogiston idem cum igne ratus, diversam animalis caloris explicacionem reddidit. In hac, respirationem nihil ad generationem caloris conferre opinatur. Sed quae sunt hujus viri sententiæ in ipfissimis verbis, ut ex diversis partibus ejus libri excerpī, exponere malo. Primò, hæc habent verba sua de phlogiston: “ From what has been said on the nature and energies of phlogiston, it may I presume, be justly inferred, that it is nothing else than the pure, ethereal, and simple element of fire, inherent in all natural bodies, intimately connected or blended with an acid, earthy, or other base, and apparently perhaps, though not really, remaining therein in a quiescent state, till excited into action by friction, attraction, adventitious heat, or other similar means.” His commentis fretus, animalium calorem non respiratione, sed ab evolutione hujus principii pendere putavit.

tavit. De respiratione in duobus locis dicit : “ We are induced to infer, that the sole and ultimate purpose of respiration, is to carry off from the body the phlogiston, which the circulating powers are perpetually evolving from the general mass of blood, and reducing to an active state : ” et iterum, “ For while he (Doctorem BLACK innuens) considers respiration as absolutely necessary to the generation of heat, I look upon it as the chief means employed by nature for diminishing the heat of animals.” Denique sequentibus verbis suam opinionem tradit : “ My idea is briefly this, that the subtle principle, by chemists termed phlogiston, which enters into the composition of all natural bodies, is, in consequence of the action of the vascular system, gradually evolved throughout every part of the animal machine, and that during this evolution heat is generated \*.” Hæc sunt principia quibus theoria Domini LESLIE nititur ; in mente uniuscujusque rebus chemicis docti, tam facile refellitur, ut

vix

---

\* LESLIE’s Inquiry into the cause of Animal Heat.

vix mihi aliquid ei objicere necesse fit. Nisi phlogiston idem esse cum igne, et revera in natura existere probatur, ex imis sedibus hæc theoria ruit. Omnes hodierni chemii talem opinionem repudiant, et quod ab STAHL et antiquis in quaque substantia latuisse credebatur, nunc aëris quam spiravimus ex decompositione effici demonstratur. Calorem gignendi tres tantum modos scimus; nempe, frictionem, combustionem, et chemicam decompositionem. Sed sub quoniam horum productio caloris in corpore humano, secundum LESLIE, collocari vult? Non sub combustione; nam respiratio, et deinceps aër, adesse non necessarius est. Non sub chemicâ decompositione; nam nihil de hac loquitur: Et non sub frictione, nisi ejus verba “specific action in the containing vessels,” hoc designare putantur.

Dr CRAWFORD, in libro qui attentionem philosophorum latè vindicavit, ut difficultates supradictis theoriis objectas evitet, doctrinam jam ab Dre IRVINE susceptam, amplexus est. Secundum hanc; ignis, vel caloricum, substantia subtilis esse existimatur, diversè a corporibus

poribus attracta, et iis diversis quantitatibus insidens: Ex hoc constat, plurima esse corpora ejusdem temperiei, magnitudinis, et ponderis, (sed naturâ dissimiles), quæ tamen ut eandem temperiem attingant, quantitates calorici prorsùs diversas concupiscunt. Hæc affinitas vel facultas variis corporibus insita, diversas calorici quantitates continendi, eorum Capacitas (Anglicè *capacity*) nominatur. Alterum est etiam diversum principium, nempe Phlogiston, variis quantitatibus in corporibus fixum: hoc principio præsente, eorum capacitas pro calorico imminui, et absente, augeri dicitur: nam caloricum et phlogiston duo sunt principia, sibi invicem opposita, et quod plus unius cuilibet corpori adjectum fuerit, eò plus alterius disjungitur: sunt quasi hostes declarati, eandem tenere habitationem volentes, et ab ea se se mutuò expellentes. Combustio denique, et calor animalis provenit ex diminutione, quam subit aër dephlogisticatus, quando vel combustione, vel respiratione, phlogisticatur.

Ex his principiis CRAWFORD, calorem animalium in respiratione generari, sequenti fe-

rè

rè modo, judicat. Sanguis per venas ad pulmones ex diversis corporis partibus, cum hydrocarbonio, quod per tunicas vasorum capillarium accipit, onustus redit. Oxygenium aëris inspirati, hoc hydrocarbonum majori vi quàm sanguis attrahit ; ad superficiem igitur pulmonum cum oxygenio conjungitur, acidum carbonicum et aquam procreans ; in cuius formatione, secundum suprà exposita principia, et calor evolvitur, et capacitas sanguinis pro calore eodem tempore augetur ; pars caloris hoc modo generati, a gase et ab aqua ad statum vaporis calefacta, absorbetur ; et altera pars in sanguinem arteriosum, nunc magnâ capacitatem præditum, intrat : per circuitum ejus, sanguis arteriosus admitione hydrocarbonii in sanguinem venosum convertitur ; et quia hâc mutatione caloris minus capax evadit, redundantem deponit calorem in forma sensibili, ad temperiem corporis alienandam \*.

Quoniam hâc theoriâ, multorum animi doctorum altè imbuti sunt, principia quibus fulta est versare memet accingam.

Hoc

---

\* CRAWFORD on Animal Heat.

Hoc systema veritate hypotheticâ sequentium propositionum pendet.

PROP. I.—“The quantity of absolute heat contained in pure air is diminished by the changes it suffers in the lungs of animals, and the quantity of heat in any kind of air fit for respiration, is nearly proportioned to its power of supporting animal life.”

PROP. II.—“The blood which passes from the lungs to the heart by the pulmonary vein, contains more absolute heat than that which passes from the heart to the lungs by the pulmonary artery.”

PROP. III.—“The comparative quantities of heat in bodies, supposed to contain phlogiston, are increased by the changes they undergo in the processes of calcination and combustion.”

PROP. I.—Vix aliquid intelligi potest verbis “absolute heat of a body,” nisi ultra dubium ponetur, calorem ex materie constare, et corpora secundum suas densitates occupare. Quomodo invenire possumus quæ sit quantitas absoluti caloris in aliquo corpore?

F

Quænam

Quænam est mensura ejus quantitatis? Non negatur multas esse substantias quæ faciliùs quām aliæ suum calorem corporibus propinquis impertiuntur, et quæ ut eandem cum aliis temperiem attingant majorem vel minorem caloris quantitatem, ut thermometro indicatam, poscunt. At hæc, non quantitatem absolutam caloris quovis corpore inditam, sed tantūm ejus majorem minoremve affinitatem pro calore, vel potestatem ejus calorem per partes suas transmittendi, demonstrant. Omnia hæc experimenta quæ cum aqua, ut mensuræ norma, cum metallis et aliis substaniis a Doctore CRAWFORD peracta fuerunt, nihil pro certo de capacitate corporum, vel de quantitate caloris in iis, decernunt. Si, e. g., una libra aquæ ad  $100^{\circ}$  calefacta, misceatur cum altera hydrargyri libra ad  $50^{\circ}$ , et si mistura facta hydrargyrus  $30^{\circ}$  acquisivit, cùm aqua tantūm  $20^{\circ}$  amiserat; cur ex hoc inferri debet, calorem absolutum unius libræ aquæ, majorem esse calore absoluto unius libræ hydrargyri, in ea ratione qua thermometrum indicat? Quid vetat quin hydrargyrus semper majorem caloris quantitatem, quām aqua, in se fere contineat,

tineat, quapropter invitus erit plus absorbere, et ideo in hac substantia caloris data quantitas manifestiores edit effectus? Hæc deductio, æquè cum logica ratione ac ea a CRAWFORD facta, congruit. Preterea, quomodo potest thermometrum indicium esse caloris absoluti cuiusvis corporis? nam non est fixa mensura caloris materiei; tantum secundariè afficitur, secundum varias leges omnem substantiam gubernantes: nec caloris quantitatem in eo congesti exprimit, sed tantum corporum potestate, calorem retinendi vel impertiendi. CRAWFORD nullam aliam rationem affert, cur quantitas absoluti caloris aëri puro (oxygenio) contentus, a mutationibus quas in pulmonibus subit, imminui debet; nisi quod hâc mutatione *capacitas* ejus diminuitur. At experimenta ejus inter *capacitatem* aëris dephlogisticati et phlogisticati differentiam ostendentia, ab aliis repetita, nunquam tam mirabile monstravere discrimin, ut paulò post monstrabitur: quæ etiam suprà observantur, in hæc experimenta veniunt objicienda, et nisi tolli possunt, parùm fidendum erit expositionibus, quæ tantum meris ex ver-

bis,

bis, nihil ad docendum accomodatis,—“*capacity for calorific,*” &c., promptæ sunt;

— cadentque

Quæ nunc sunt in honore vocabula, si volet usus.

Bene notum est, omnes substantias majorem caloris quantitatem ut in fluida vel gasia convertantur, attrahere; et hanc acceptam, magis enixè inter suas partes tenere, quām in forma solida; in quam formam iterum mutata, superfluum calorem deponunt. In eodem forsan modo verum est, quòd quā ratione gas vel aër aliquis potestates inflammabiles ostendit, eā exilior et levior est; et probabile etiam videtur, hanc exilitatem et levitatem secundum vim esse repellentem quem inter se ejus particulæ exercent. Si hoc gas elasticum densius factum sit, ut in conversione aëris dephlogisticati in aërem fixum, tunc facile concipi potest, corporibus propinquis aliquod ejus vis repellentis nunc liberè vagari passæ, impertire. Nam hoc modo solummodo, quicquam ex hac positione Doctoris CRAWFORD intelligere possumus. Tamen comparatio inter densitatem specificam aëris dephlogisticati et phlogisticati, ad extricandam tam magnam caloris

caloris copiam, nullo modo sufficit, (si quidem concessum erat calorem materialem esse), vel ad impertiendum tantum vis repellentis, (si non ex materia constat secundum nostram opinionem), quam Doctoris CRAWFORD sistema exigit. Nulla certa esse experimenta, nobis persuasum est, quæ aliquod sensile discrimen inter capacitatem (ut vocatur) aëris dephlogisticati, phlogisticati, vel fixi, demonstrent, vel calorem abfolutum unius, calore absoluto alterius majorem esse. Vesicas, aëris dephlogisticati et fixi plenas, et ad eundem gradum calefactas, ut a thermometris in iis accuratè fixis apparuit, in vas aquæ gelidæ immisi, in quo stetit thermometrum: Aqua leviter tantum incaluit, sed thermometrum eodem modo ab utraque vesica afficiebatur. Experimenta etiam his contraria cum iisdem vesicis feci; nam eas in aquam ad  $170^{\circ}$  calefactam immersi, et thermometra in iis fixa eadem ratione et celeritate affici visa sunt.

Hinc non nobis liquet, quid hæc Doctoris CRAWFORD verba designant, “ That the same heat which raises pure air one degree, will raise fixed air three degrees.” Nescio an sint illa experimenta quibus nihil objici potest,  
quæ

quæ tales ederent effectus, et forsan meam condonarent diffidentiam, qui quod olim a præclaro NEWTONO notatum fuit noscunt, “that a thermometer *in vacuo* will grow warm as much and almost as soon as a thermometer which is not *in vacuo*.” Dr CRAWFORD ipse ingenuè confitetur, minimè accurata esse ejus experimenta de his rebus, in prima sui libri editione: similes tamen ferè exitus dedit, de periculis suis posterioribus; et quoniam eadem consequentiæ non ex veris ut ex falsis præmissis obtineri possunt, ipsius verbis pro argumento contra hanc positionem, utar: “It must be observed, that those experiments were made under very unfavourable circumstances. They were my first attempts towards the discovery of truth in an obscure and intricate part of science, where the sources of error were numerous, and the means of avoiding them had not been ascertained.”

PROP. II.—Secunda ejus propositio, (viz. quod plus habet absoluti caloris sanguis arteriosus quam venosus), tam lubricis experimentis fundata est, ut nemo ingenuus ex iis fallacissima

fallacissima conjectaria oriri negat; nam utriusque sanguinis generis in suis experimentis, nec eadem fuit vel quantitas, vel tempries, vel tempus quo coagulatio supervenit; itaque impossibile apparet, quidquam pro certo ex iis colligere, quamvis eorum effector, in mathese Newtono, et arithmeticā speciosa, ARCHIMEDI præstitisset.

PROP. III.—Tertia propositio (quod capacites corporum auguntur calcinatione et combustionē, quia in his amittunt phlogiston) tantum de metallis vera est. Experimenta cum ligno et carbone facta, contrarium probant; et cl. philosophus KIRWAN etiam alcoholis calorem absolutum majorem esse invent, calore absoluto aquæ, in ratione 108.6 ad 100. Dom. MAGELLAN idem de solutione sacchari in aqua notat: sed hæ substantiæ inflammabiles sunt, et si vera fuisset Doctoris CRAWFORD positio, caloris absoluti minorem quam aqua copiam haberent. Hæc igitur propositio, non semper vera est, quæ ut principium vel fundamentum aliquod hujus viri sagacis opinionibus præbeat, universè valere debet.

Ut

Ut nihil amplius singulatim de propositiōnibus Doctoris CRAWFORD dicam, notandum venit, quod calor sensibilis non secundum ejus theoriam, rationem cum quantitate aëris phlogisticati formata habet; nam secundum experimenta illustrissimi LAVOISIER, quando corpora in aëre puro usta fuerunt, ubi combustio quadruplo magis quam in aëre atmosphärico vehementior est, tamen aëris phlogisticati productio novies minor fuit; ideo aëris phlogisticati quantitas e pulmonibus ejecta, non potest accurata mensura fieri, caloris in iis generati. Non tantum sunt hujus theoriæ principia errore involuta, sed etiam res ipsissimæ in corpore animali contrariæ sunt, quæ ei favere existimantur. Dr CRAWFORD pro concessō sumit, quod majori copiâ in sanguine venoso, quam arterioso, carbo extat. Hoc verò non extra dubium probatur, neque causa ulla probabilis ejus datur. Secundum suam opinionem, ex materie animali putrescente originem dicit; at vita persistante, talem processum unquam in corpore sano fieri hoc regulari et constanti modo approximè necessariò, si ad sustinendum calorem animalium

animalium a natura designatus esset, mihi impossibile videtur. Quinetiam hâc putredine in corpore animali concessâ, nescimus quomodo hydrocarbonium, ex ea veniens, rectâ viâ sanguinem venosum intrare potest. Venæ rubræ ex arteriis sanguinem recipientes, tunicis validis et densis compositæ sunt, et nunquam audivimus eas valvularium lymphaticorum in omnibus corporis partibus munere fungi, præsertim absorptio[n]e materiei putrefcentis. At si reverâ sanguis venosus majorem quantitatem hydrocarbonii quàm arteriosus non inventus erit continere, quid stabilitati habebunt hæ, et omnes similes theoriæ, iisdem ferè principiis, calorem animalium explicantes? Dr CRAWFORD nunquam hoc verum esse ullis periculis probavit; tantum ex animo rem finxit ut bene profarentem aliquam enodationem caloris animalis, secundum suam opinionem caloris sensibilis. Experimenta a Prof. ABILGAARD nuper facta, rem aliter probant; nam secundum hæc, sanguis arteriosus majorem carbonis copiam habet quàm sanguis venosus; et ut ita fo-

ret verisimile est, ut in alio loco monstrabimus.

Nobis videtur, Doctorem CRAWFORD non tantum in suis documentis de causa caloris sensibilis infelicem esse, sed etiam pro concessis assumpsiſſe quæ quòd ad corpus humanum, neque veræ, nec aliis manifestæ fuerunt: hujus exempla dedimus, et hoc alterum tantummodo adjicemus. Quia hydrogenium colorem nigricantem, secundum experimenta PRIESTLEY et HAMILTON, sanguini arterioso impertitur, Dr CRAWFORD conclusum habuit, ejus mutationem in sanguinem venosum hujus elementi cum carbone associati præsentia pendere: Ab hoc omnino diversum experimenta Doctoris BEDDOES probant, nam sanguis venosus animalium gas hydrocarbonatum respirantium, floridum colorem acquisivit; et idem ei in contactu cum hoc gase extra corpus posito accidere visum est\*. Si hæc et experimenta Professoris ABILGAARD jam notata, quæ carbonium minore copia in sanguine

---

\* BEDDOES on Factitious Airs.

guine venoso inesse docent, vera sunt; vix aliquid auctoritatis theoriæ Doctoris CRAWFORD relinquiretur.

LAVOISIER theoriam tradidit ab jam notata discrepantem, quod ad mutationes quas sanguis in pulmonibus subit; sed productionem caloris animalis iisdem ferè principiis, nempe ex combustione, explicantem. Ex suis verbis, inter has theorias diversitas melius colligitur. Mutationibus quas aër subit notatis, hæc habet: “En-effet, d'après ce qu'on vient de voir, on peut conclure qu'il arrive de deux choses, l'un par l'effet de la respiration au la portion d'air éminemment respirable, contenue dans l'air de l'atmosphère, est convertie en acide crayeux aériforme en passant par le poumon: ou bien il se fait un exchange dans ce viscere; d'une part, l'air éminemment respirable est absorbé, et de l'autre le poumon restitue à la place une portion d'acide crayeux aériforme, presqu' égale en volume\*.” LAVOISIER hanc opinionem hypotheticè

---

\* Mémoires de l'Academie Royale de Sciences,  
an 1777.

theticè tantùm notavit; nam ad illam a Doctore CRAWFORD prolatam, magis proclivis fuit; sed brevi postea, sub auspiciis duorum philosophorum, LA GRANGE et HASSENFRATZ, edita est. Hæc theoria tantùm cum ea Doctoris CRAWFORD litigat de loco ubi conjunctio inter oxygenium inspiratum, et hydrocarbonium sanguinis, accidit: Nam secundum opinionem quam amplectitur CRAWFORD, hæc confociatio in pulmonibus solummodo evenit; sed secundum hanc quam nunc perpendimus, dum absolvitur sanguinis circuitus facta est. Ad summum, tantùm de loco quo aqua et acidum carbonicum gignuntur dissentient, ut contra opinionem Doctoris CRAWFORD ex sequentibus argumentis apparet, quibus LA GRANGE et HASSENFRATZ oxygenium a sanguine venoso absorberi consentiunt, in sanguine arterioso solutum teneri, et tantùm in circulatione cum hydrocarbonio confociari, calore tunc sensibili extricato: “ Il suit des observations et des éxperiences contenues dans ce mémoire, imò, Que la couleur rouge du sang est la resultat de la dissolution

dissolution du gaz oxygène avec le sang : 2dò, Que sa couleur brune et même noire, est occasionnée par la combinaison de l'hydrogène et du carbone du sang avec l'oxygène qui y étoit dessous : 3tiò, Que les poumons ne font pas le foyer où se dégage tout le calorique nécessaire à entretenir la chaleur animale : 4tò, Que le calorique nécessaire à entretenir la chaleur animale, se dégage pendant la circulation du sang, par la combinaison de l'hydrogène et du carbone du sang avec l'oxygène qui y étoit mélangé \*.” Quamvis cum LA GRANGE, HASSENFRATZ, et DAVY, diximus oxygenium a sanguine arterioso absorberi ; tamen, contra suas explanationes productionis caloris in corpore vivente, eadem objicienda sunt, ut antehac in scrutatione Doctoris CRAWFORD theoriæ. Hic loci non nostrum est litigare, de modo vel ratione quo sanguis venosus in sanguinem arteriosum mutatur. Hoc, ad eos qui de respiratione tractant, melius relinquimus. Quasdam

---

\* Annales de Chimie, tome ix.

dam verò hujus theoriæ partes, magis ad rem nostram pertinentes, notabo.

1mò, Rogandum venit, quomodo in sanguine venoso acidum carbonicum purum ad effet, salvâ ejus compositione chemicâ; sanguis enim quantitatem puræ sodæ continet, quæ majori vi, acidum carbonicum quovis alio ejus principio si præsens effet, attraheret; tamen, in analysi sanguinis venosi, nunquam carbonatem sodæ in eo quam in sanguine arterioso majori copiâ deprehendimus. 2dò, Acidum carbonicum a PRIESTLEY in compositionem sanguinis tam magnâ vi inventum est pollere, ut pro oxygenio ejus attractionem deleret\*. 3tiò, Hoc elementum adesse nunquam quibusvis experimentis detectum fuit; nisi quando aderat oxygenium, vel aër atmosphæricus, vel (ut in experimentis Domini DAVY) quando calor cui in experimento sanguis subjectus erat, temperiem corporis animalis multos gradus superavit; quibus omnibus conditionibus verisimile est, sanguinem ex statu naturali prorsus mutari. Postremò,

hæc

---

\* PRIESTLEY's Experiments on Air, vol. iii.

hæc theoria nullum fontem, vel probabilem vel improbabilem, unde ad sanguinem hydrocarbonium par est venire, monstrat.

Explicatio horum phænomenorum quæ, nostrâ opinione, præ cæteris hodiernis maximè arridet, in doctis suis prælectionibus, a viro ingenioso Dom. ALLEN enarratur \*. Opinatur sanguinem per venas redeuntem, hydrocarbonium suum ex chylo recipere. Omnia quæ cibum hominibus ministrant, hydrogenio et carbone cum parva oxygenii quantitate consociatis, et salibus, et terris, abundant; substantiæ inflammabiles cum majore oxygenii quantitate magnoperè confociari volunt; hoc in pulmonibus recipiunt, ubi sanguine arterioso solutum tenetur; actione vasorum ex parte conjunguntur, et calor liberatur; tamen in hoc rerum statu hydrocarbonium tantùm oxydatur, major oxygenii copia ad formandam aquam et acidum carbonicum necessaria est, et hac potitur ex aëre inspirato quando ad pulmones iterum venit; e quibus tunc, in forma acidi carbonici et aquæ, ejicitur.

De

---

\* Lectures on the Animal Economy.

De fonte ex quo sanguis hydrocarbonium dicit, et de mutationibus quas subit, in ea theoria solerter differitur. Sed qui ex hac vel aliis theoriis adhuc promulgatis, æquam et veram causam caloris animalis deducere sperat, nostrâ opinione, “rusticus expectat dum defluat amnis.”

Multa nos vetant his consentire, qui sola combustione inter oxygenium et hydrocarbonium, animalium calorem colligunt. Modus quo hæc combustio in corpore vivente contingere potest, nobis non liquet. Hydrogenium nunquam cum oxygenio ad calorem producendum sese conjungit, absenteflammâ vel scintillâ electricâ; nullum documentum habemus, talem combinationem aut in pulmonibus, aut in sanguinis circuitu fieri, probans. Dr. CRAWFORD primus hanc opinionem notavit, quia enixè cupiebat calorem animalium chemicis principiis explicare. Videbat quantitatem vaporis expirari, et tunc felicissimum omnium sese putavit, quia Dom. CAVENDISH compertum habuit aquam ex ustione hydrogenii cum oxygenio gigni. Nunc Doctori CRAWFORD nihil aliud deerat,

nisi

nisi ut in pulmonibus hanc fabricationem aquæ colloquaret, et ut calor hoc processu liberatus, in sanguinem arteriosum ad calefaciendum corpus suscipiretur.

Opinor D<sup>re</sup>m CRAWFORD, et omnes qui tale chemicum phænomenon ex natura externa in humanum corpus sine aliqua modificatione transferunt, haud paululum seipso decipere. Putantne fornacem, vel machinam electricam, in pulmonibus adeffe? vel quomodo, salvis partibus adeò teneris, fieri potest, ut combustio ad aquam producendam necessaria eveniat? Si dixerint hanc combustionem pertardam esse; respondeo, quod tarda combustio nec sufficit aquam gignere, nec talem copiam caloris, quam hæc pars theoriæ Doctoris CRAWFORD postulat. Nulla combustio inter oxygenium et hydrogenium in temperie corporis animalis accidere potest. Sed ut hanc evitarent objectionem, hydrogenium in statu nascenti esse dicunt, quando hæc combinatio accidit,—nam dum vitant vitia, in contraria currunt. Fac hæc ita fint; quomodo procreatur aqua? Nunquam aquam procreari audimus, combustione hydrocarbonium inter et

oxygenium, nisi quando ambo in statu elastici gafis fuerunt; et ea in hoc statu intimè in pulmonibus conjungi ad aquam formandam et calorem extricandum, antehac impossibile esse monstravimus, absente flammâ vel scintillâ electricâ.

Ad errores hujus opinionis monstrandos quos viri ingeniosi adhuc amplectuntur, in unum contrahemus conspectum omnia quæ obtinenda sunt ut hydrogenium sanguinis cum oxygenio aquam formet. Quum hydrogenium, ut perhibent, in statu nascenti, antequam ejus cum oxygenio associatio, in sanguine existit, necessarium fit, ut magnam caloris copiam, ad conditionem gaseosam assumentam absorbeat. Quando hæc coloris absorptio accidit, secundum leges calorem gubernantes et constitutionem corporis humani, sensationem frigidam in pulmonibus habere debemus, nam pro tempore calor latens fit. Si post hoc ad eliciendam aquam hoc gas cum oxygenio inspirato exemplò coalesceret, non tantum ut flamma vel scintilla adesset neceesse est, (nam fine his maxima temperies talem non faciet combinationem), sed etiam ex iisdem

dem legibus caloris, et constitutione corporis antea dictis, fervorem cādente in pulmonibus nunc accidere oportet: et quod præcipue attentionis nostræ dignissimum manet, modus est extemporalis quo omnes hæ chemicæ combinationes fiunt; nam aër inspiratus haud diutius quām duobus temporis punctis in pulmonibus moratur. Infausti fuerunt LAVOISIER et ejus comites qui non prius detexerant hanc promptam viam aquam ex combinatione ejus principiorum faciendi, quam pér totas dies et noctes experimentis incumberunt, quæ talem productionem aquæ ostenderent; et ubi post tantum laboris, artificii, et fatigationis, tam parvam aquæ quantitatem colligerunt, ut si quispiam inscius chemicorum principiorum adstaret, forsan exclamâisset, si non in verbis ipfis, tamen ad eundem sensum, “Parturunt montes, nascitur ridiculus mus.” At omnino deest ratio, cur hæc de formatione aquæ ex coniunctione ejus elementorum in pulmonibus CRAWFORD proferat; nam origo et minus dubia, et facilior intellectu, et cum aliis œconomiæ animalis phænomenis melius congruens, ultro sese nobis offert. Ex computationibus Doctoris HALES, superficies bronchio-

rum

rum et cellularum aëriferarum totam externam corporis superficiem æquat; ab superficie corporis magnam vaporis quantitatem indies perspiratione evehi, experimentis monstravit. Ut idem ex superficie pulmonum accidat, multa enixè favent; nam semper madida est rore per vasa minutissima effuso, et aër inspiratus ad gradum 97° evectus hanc superficiem humidam verrit, et aquâ onustus tunc expiratur. Quinetiam experimenta a LAVOISIER et SEGUIN facta, hoc penè extra dubium ponunt; nam ex eorum tabula constat, quantitatem aquæ perspiratione uno die liberatam quantitatem pulmonibus ejectam multùm superare \*. Causam igitur æquam et simplicem vaporis expiratione emissi habemus, et in leges philosophandi, ut Doctor CRAWFORD, non impetum facimus, iisdem effectibus eodem corpore longè diversas et plures causas assignando: nam, ut dicit NEWTON, “ Frustrà fit per plura, quod fieri potest per pauciora.”

Nunc ad considerationem alterius, et penè universè creditæ causæ caloris animalis, (nempe,

---

\* Mémoire sur la Transpiration des Animaux. Mém. de l'Acad. des Sciences, 1790.

pe, acidi carbonici formationem), progrediendum est.

Quamvis inter philosophos litigatur de loco ubi oxygenium inhalatum cum carbone, ad gignendum acidum carbonicum, conjugatur, tamen omnes talem combinationem accidere, et ne quidem magnum calorem, sed aliqui omnem calorem animalium, ex hac coalitione generari, afferunt. Quod ad evolutionem acidi carbonici ex pulmonibus pertinet, do lubens manus; et experimenta a DE MILLY, INGENHOUZ, ABERNETHY, et JURINE facta, hoc non tantum pulmonibus excerni, sed etiam ex tota superficie corporis, probant.

Attamen his magnis effectibus quos philosophi ex hoc phænomeno promunt, non affentiendum est. Ut oxygenium cum carbone in pulmonibus coalescat, prorsus necessarium est, carbonem esse in statu nascenti; nam hâc conditione absente, in naturâ talem conjunctionem in temperie animalis corporis nunquam conspicimus. Quando hic carbo cum oxygenio conjunctus, carbonici acidi gafis formam induit, magnam portionem ejusdem caloris qui prius credebatur corpus calefacere abforbebit,

absorbebit, et latentem reddet. In nullo exemplo chemicæ combinationis inter oxygenium et carbonium in inferiori temperie, (ut in fermentatione vinoſo et putredine ſubſtantiarum vegetabilium), unquam cernimus horum corporum calorem multùm transcendentem calorem corporum propinquorum; quamvis formatio acidi carbonici tantò major et celerior eſt quàm in corpore humano. Ideóque horum philofophorum, qui ex tam parva cauſa tam magnum effectum deducunt, ratiocinationem ex animo rejicere cogor. “ Neque profecto, (ut dicit sagax GREGORY), aut leges philofophandi, aut quidem ſensu communis, finunt fidem habere ulli ratiocinationi, utcunque ſpeciosæ, cui experientia adverſatur \*.”

Nunc ſupereſt, ut aliquam explanationem ex meipſo proferam; et hanc ſequentibus paginis, utcunque poſſum, aggrediar.

Postquam Dr BLACK in aëre expirato acidum carbonicum indagavit, chemii, omnes antiquas

---

\* GREGORY's Conspectus.

tiquas theorias caloris animalium perpendebant, et ut fuitiles rejiciebant; nam nunc per combustionem, caloris corporis et mutationum sanguinis rationem dare, inceperunt. At infeliciter omnis theoria de causa combustionis adhuc prolata, ex imis sedibus laborare mihi appetit. Contra omnes philosophandi leges, materialitatem caloris, rem neque argumentis, neque experimentis probatam, neque ex ratiocinatione probabilem redditam, ut concessam assumunt. LAVOISIER, FOURCROY, et alii, combustionem, ab attractione mutuè exercita et sequenti combinacione inter oxygenium aëris atmosphærici, et corpora inflammabilia, exire credunt: in hunc errorem Dr CRAWFORD etiam incidit; nam externam causam combustionis incipientis, ut inutilem habet. Sed, quomodo hoc modo hi philosophi nebulam pro Junone amplexi sunt, nescio. Pro certo constat, hanc attractionem non causam esse, sed tantùm combustionis effectum; nam semper necesse est, ut combustio antecedat; et ideo philosophi haec tenus de causa efficiente combustionis nihil verè protulerunt, ejus phænomena, postquam

quam incepta est, tantum enodavere. Nunquam mihi accidit, ullam combustionis theoriam videre, rationem redditentem, neque prorsus singularis attractionis inter oxygenium et corpora inflammabilia, neque quantitatis caloris latentis quem hoc gas in tanta majore abundantia quam alia gafia ejusdem gravitatis specificæ, continere dicunt: res certa esse habetur, sed quare ita est, non mihi constat; hujus enim quæstionis difficilis, ex ullis naturæ phænomenis nec explicatio data, vel investigatio facta est.

Liquet ex principiis in initio hujus differentiationis in medium prolatis, calorem his omnibus modis generari, qui corporis alicujus texturam destruentes, simul ejus particularum vim repulsivam augent, et majus spatium occupare finunt. Tantos habere effectus, impulsum mechanicum, et chemicam decompositionem, facilè intelligi potest; at in combustione, ubi effectus iidem observantur, notatum dignissimum est, excepto oxygenio, nulla alia gafia in conjunctionem cum corporibus inflammabilibus intrare, ad flammarum vel calorem generandum. Ad hunc Gordianum nodum

nodum solvendum, chemii oxygenio majorem caloris absoluti copiam quām aliis gasibus tribuunt. Sed major gradus caloris latentis nulla est causa, cur oxygenium *semper* inflammabilibus substantiis, dum alia gafia *nunquam* attrahuntur; si ex hoc penderet inter has substantias attractio, non genere, sed tantūm in gradu, diversa esse debet. Sed quod oxygenium calore majore fruitur quām aliud ejusdem gravitatis gas, tantūm est mera fictio, et materialitatem caloris, ut principium nullius documenti indigens, assumit. De hac opinione antehac differuimus; et hanc positionem, experimentis Doctoris CRAWFORD errori tam obnoxiis ex eorum natura et circumstantiis, fundatam, nullo modo credendam esse putavimus.

Quando corpora extenuata in vaporem vertuntur, secundūm tenuitatem suam calorem absorbent: cur ut oxygenium hæc gafia edere recusant calorem etflammam, quandocunque densiorem assumere formam coguntur? nam hujus principii, quocunque fit, redundantiam habent; et quare in hac ratione eum emittere nolunt ut oxygenium, non

mihi compertum est. Exitus tam diversos iisdem principiis inexplicabiles putavi ; et jure mihi visus sum, hos diversos exitus ad diversa principia referre ; cùmque agilem naturam oxygenii et mirandas suas actiones in corporibus omnibus perpendisse, non ineptum mihi apparuit hæc electricitati quæ huic insit tribuere. De natura electricitatis, multæ et sanè diversæ opiniones, omnibus temporibus, editæ fuerunt. Aliqui fluidum esse subtile *sui generis*, nempe ab aliis cognitis fluidis prorsùs diversum, ut verba exprimunt, statuerunt : dum aliis, ex argumentis non ratiocinatione parentibus, electricitatem vim repulsivam esse in subtili æthere agentem, persuasum est ; et non desunt philosophi qui electricitatem cum igne eandem esse putant. Duæ primæ opiniones nullâ certâ regulâ negandæ sunt ; hypotheticè propositæ sunt, et tantum vim hypotheticam habere designatæ fuerunt.

Sed et observationes, et experimenta, et ratio, unâ voce posteriorem sententiam non recipiendam esse conclamat. Calor ab electricitate mirum in modum facilè gignitur ;

verùm

verūm ex impulsu mechanico eundem exire observamus, et nemo sanus vim mechanicam nomine caloris vocat.

Iis aliquid de electricitate scientibus bene notum est, hanc subtilem materiem, in velocitate, in violentia ejus ictūs et impulsūs, omnibus aliis corporibus notis multūm eminere; citius dicto corpus pervadit, et in maiore quantitate, corporis structuram, citius dicto penitus destruit. Nunquam vidimus calorem tardè graffantem, hos magnos et subitos effectus habentem.

Multa alia sunt quæ huic sententiæ objici facilè veniunt; at quoniam brevis esse labore, experimenta ab VAN MARUM hujus scientiæ peritissimo, hanc rem decernere facta, tantūm commemorabo. Hic vir expertus quædam metallorum, tam in aëre phlogisticato, quam in aëre dephlogisticato, penitus calcinavit; et quando impetu electrico ea liquefecit, omnino diversos exitus quam si igne liquefacta essent, conspexit. Partes multorum metallorum ad eandem densitatem excusas sumpfit, et ictus æquales ex ejus machina electrica per omnes trajiciens; metallorum diversorum

diversorum portiones ut in sequenti tabula liquavit :

Plumbi,	-	-	120 pollices.
Stanni,	-	-	120
Ferri,	-	-	5
Auri,	-	-	3 $\frac{1}{2}$
Argenti, Cupri, et Æris, penè			$\frac{1}{4}$

Hoc modo, potestatem quam electricitas liquandi metalla possidet, invenit ; et hanc ab actione ignis diversam esse, experimenta a sociis Academiæ Dijonensis facta, satis probant. Secundum hæc ; metalla suprà dicta, sequentes caloris quantitates, ut mensuratas ab thermometro REAUMEURI, ad liquefactionem poscerunt :

Stannum,	-	172°
Plumbum,	-	230°
Argentum,	-	430°
Aurum,	-	563°
Cuprum,	-	630°
Ferrum,	-	696°

At in experimentis cum electricitate, eadem fuerunt propensiones plumbi et stanni

ad liquefaciendum; sed cum igne penitus diversæ sunt, ut ex tabulis suprà positis apparet: atque ferrum ab igne difficiliùs liquefieri inventum quàm aurum, in multo majori copia iictu electrico liquari potest. VAN MARUM ex his, et aliis similibus experimentis, concludit; Electricitatem in metalla ex igne protinùs diversam vim habere, et nullam similitudinem iis inesse, neque fusione metallorum, neque ignitione corporum inflammabilem. Quamvis dissimilem igni electricitatem probamus, tamen a viris ejus phænomenorum peritis, optimos facere deductores (*conductors*) substantia inflammabilia dicuntur. De hujus veritate tam persuasum fuit Doctori PRIESTLEY, quòd ex multis experimentis hanc virtutem phlogisto in corporibus inflammabilibus, non moratus est attribuere. Magna philosophorum caterva, et certè haud parvæ famæ, electricitatem magnâ abundantiâ in aëre atmosphærico teneri consentiunt.

Ex hoc forsan solo, est ejus origo et fons. De hac Abbathus BERTHOLON dicit: "Mais graces aux expériences de DALIBARD, de DELORD, de LEMONIER, de RAMAS, de FRANK-

LIN, nous savons que cette masse d'air qui nous environne est une source inépuisable de fluide électrique ; et, pour me servir de l'expression de M. LEMONIER, qu'elle est un *vrai magasin de l'électricité*\*." Hoc subtile fluidum, aut in omnibus aëris partibus qui simul atmosphäram formant, vel cum uno solummodo, conjunctum tenetur.

Hanc rem ad examen vocavi ; et cùm diversa gafia aëris atmosphärici sensilissima electrometro scrutatus essem, nulla eorum, excepto oxygenio, aliqua signa electricitatis positivi dederunt ; et etiam oxygenium combustione carbonis impurum redditum, suam electricitatem positivam amittere visum est. Ex his, oxygenium solum gasium atmosphäricorum, fluidum electricum in eo inclusum habere appareat.

Multa me opinare ducunt, quòd ejus potestas respirationem et combustionem sustinendi, ex hoc pendent. In cœlo humido, quando, secundum quorundam opiniones, ad terram

\* De l'Électricité du Corps Humain, dans l'état de santé et de maladie.

terram deducitur electricitas, et aër magis electricitate vacuus fit, ignes minore vi ardent, quām tempestate frigidâ et aridâ, ubi plenus est aër electricitatis. In priore cœlo respiratio ægrè et laboriosè perficitur ; mens æquè ac corpus languet ; tristiores fiunt homines ; natura luget ; et

Claudicat ingenium : delirat linguaque mensque,  
Omnia deficiunt, atque uno tempore defunt.

LUCR.

M. TOALDO, aëris electrifati diversas effectus notando, dicit : " Les animaux, les oiseaux surtout, sensibles aux plus légères mouvements de l'air, sont alors très agités, tantôt tristes, tantôt gais, à mesure qu'ils acquièrent, ou qu'ils perdent, ce feu qui les anime. Les plantes mêmes donnent des marques visibles de changement extérieur, par l'alteration de leur machine."

De electricitate aëris, et ejus potestate in corpora animalia et vegetabilia, vix ulla quæstio habenda est. Phænomena tonitruum et fulminum, ex actione hujus fluidi mirabundi a philosophis exposita sunt. Ex hoc forsan oriuntur, et violentæ et placidæ ventorum agitationes ;

tationes; et sperare inducor quod multa adhuc inscrutabilia et obscura animantium phænomena claris oculis conspiceremus, quando in majorem electricitatis notitiam perventum est. M. DUCARLA in eandem currit sententiam: dicit; "Peut-être sera-t-il (l'électricité) reconnu quelque jour comme le principe des fonctions animales, l'instrument de la volonté, et le véhicule des affections." Hanc agilem actorem, et agiles virtutes et potentias dare omnibus cui inest corporibus, res verisimilis est.

Quoniam ab experimentis quibusdam antea dictis, oxygenium omnium gasium solum, electricitatem positivam monstrare mihi apparuit; non dubius hæsi quin ad hanc, qualitates ejus activas comburendi et mutandi corpora, cum ratione opponam. Omnibus hoc notum est, quod ad promovendam electricitatem, duo diversa corpora apprimè sunt necessaria; unum ad excitandum, alterum ad fluidum deducendum. Omnia corpora inflammabilia, ut propriis observationibus constat, optimi electricitatis deductores sunt, et hanc habent qualitatem antequam calore afficiuntur; sed ab experimentis

experimentis non dubiis patet, calorem semper potestatem corporum deductricem multum augere; et etiam corpora quae non sunt ductores, ductores facere.

Cum substantiae inflammabiles (qui optimi sunt electricitatis ductores) accenduntur, electricitatem potentissime attrahunt, et simul cum eo oxygenium aeris quo includitur. Quando oxygenium hoc modo attractum, densiorem formam assumit, tunc ad corpora propinquae ejus vim repulsivam (vel *caloric*), qua in conditione gasis tenetur, impertitur; fluidum etiam electricum, eodem tempore ab oxygenio sejunctum, per corpus permeans, velocitate ejus et violentia formam, et particularum ejus erga seiphas attractionem, solvere tendit; et hoc modo, secundum theoriam nobis initio propositam, vim particularum repellentem in actionem vocans; calor, qui in hac particularum vi constare diximus, gignitur.

Haec theoria de causa combustionis, argumentis stabilitur, quae in prima hujus dissertationis parte enumerantur. In his monstratur, electricitatem multorum corporum particulis in-

ter se vim repulsivam et erga aliorum quoque donare. Abbathus NOLLET, motum fluidorum per tubulos vitreos fluentium, magnoperè vi electricâ accelerari invenit; et ubi propter tubulorum diametrum parvum, fluidum non nisi guttatum exire potuit, pleno rivo electricitate effluere coactus est. Abbathus BERTHOLON etiam, aquam electricatam ex tubulo curvo exeuntem, per magnum spatium in minutis divisionibus spargi invenit, propter vim repulsionis ab electricitate ei inditam.

Hinc acidulationem corporum exponere ducimur: ad hanc inducendam, oxygenium necessarium est, et corpus intrat, et, secundum LAVOISIER et aliorum experimenta, pondus ejus auget. At si in aëre electricitas cum oxygenio conjuncta invenitur, magna etiam portio in aliquibus corporibus cum oxygenio retineri potest; nam quando vel calor vel ignitio corporis extinguitur, vel suâ sponte cessat, tum per ejus partes ad corpora propinqua electricitas oxygenii difficilè transfit, et cum oxygenio fixa tenetur. Sed quando quivis electricitatis apti deductores prope ea feruntur, ut corpus animale, metalla et alia corpora

corpora electricitati pervia, teruntur et destruuntur. Propter hanc causam, omnia acida violenta in corporibus electricitatis non deductoribus, ut in vitro, clausa servamus.

Indagationes in parte scientiæ electricitatis vocatæ *Galvanism* nuper factæ, veritatem hujus positionis quodammodo probant. Ex his appareat, aquam in vasis metallicis excitationi *galvanismi* faventibus, acidum dare saporem; quando etiam duo metalla diversa ad linguam accomodantur, et eorum margines colliduntur, ineffabilis fapor acidus exemplò sentitur. Forfitan omnia acida, his constant substantiis quæ habent potestatem vel qualitatem retinendi et modificandi vim repellentem ab electricitate oxygenii in iis inclusi donatam, et ex hac, ea qualitates causticas habere non improbabile est. Eximus NEWTON, in aliquo simili modo de acidis judicare præclivis fuit; dicit, “Do not the sharp and pungent tastes of acids, arise from the strong attraction whereby the acid particles rush upon, and agitate the particles of the tongue \*?”

Natura

---

\* NEWTON's Optics, lib. iii.

Natura caloris et causa combustionis tractatis, pauca de calore animalium dicenda sunt, qui ex combustionē pendere a chemicis hodiernis creditur. Secundum sententiam nostram jamjam traditam, combustionem, ab attractione inter electricitatem oxygenii atmosphærici et corpus inflammabile, exsurgere dicimus; et calorem hoc processu liberatum, constare ex viribus particularum corporis repellentibus, actionem incipere inductis, et ad magnum gradum evectis, subtili potentia electricitatis. Quibuscunque modis combustio efficitur, (quo nomine designatur actio illa inter oxygenium et corpus inflammabile), eam in corpore vivente unquam tam latè valere, ut omnem animalium calorem procreet, antehac sollicitè negavimus.

Varia virorum physiologiæ peritissimorum experimenta, et multa in humano corpore observatu dignissima, in opinionem absorptionis oxygenii a sanguine in pulmonibus, et etiam per cutem, inire me cogunt \*. Secundum

---

\* Vide Experiments a FONTANA, Opuscles Physique et Chimique; et a DAVY in BEDDOES's Contributions.

dum omnia jam dicta, electricitatem eodem tempore in corpus his modis recepi necefariè sequitur. PRIESTLEY omnia corporis humani fluida optimos esse electricitatis deductores monstravit, et rubras sanguinis particulas cæteris hac qualitate præstare. Electricitas actionem vasorum potentissimè augere nota est; hunc fontem esse irritabilitatis inducor ut credam, et si hac opinione indulsisset GIRTANNER, melius forsan certaverat contra ejus oppugnatores, et nostra sententia proprius ad veritatem accessisset, quām ubi oxygenium irritabilitatis principium faceret\*.

Investigationes GALVANI, ab VALLI, VOLTA, MONRO, FRANKLIN, FOWLER, &c. probatae et patefactæ, fluidum semper adesse in corpore humano, multis modis electricitati simile, demonstrant; et si in aliquibus attributis dissimilia sunt, nec mirandum nec prorsus eadem esse ob hoc negandum; nam ubi electricitas in corpus humanum recepta est, tunc substantiam multis dotibus ab ulla alia

in

---

\* Vid. GIRTANNER sur l'Irritabilité. Journal de Physique, 1790-1.

in natura discrepantem, intrat; nam huma-  
num corpus et diversè formatur, et ex qui-  
busdam principiis longè dissimilibus, et diver-  
sis rationibus cooptatis, confectum est; ita-  
que verisimile est electricitatem in tali cor-  
pore, et variè agere, et variè moveri. Hanc  
electricitatis diversitatem in diversis corpo-  
ribus, non melius possumus exprimere, quam  
verbis celebris poëtæ POPE, quamvis de re di-  
versa agentis:

*That chang'd through all, and yet in all the same,  
Great in the earth, as in th' ethereal frame,  
Warms in the sun, refreshes in the breeze,  
Glows in the stars, and blossoms in the trees.*

Hoc fluidum, vel *galvanism*, quod electrici-  
tati simile credo, actionem muscularē et  
sensationē concitat; et nunc acre ingenium  
magni NEWTON quod sequentem philosophi-  
cam quæstionem suggerit, admirationis dig-  
num putamus: “ Is not animal motion per-  
formed by the vibrations of this medium,  
(viz. a subtle ether), excited in the brain by  
the power of the will, and propagated from  
thence through the solid pellucid and uni-  
form

form capillamenta of the nerves into the muscles, for contracting and dilating them \*?

Creditur a GALVANI et aliis, galvanismum potentiam esse nervorum. Sed nervos energiam suam a sanguine deducere, et iterum ad vasa sanguifera aliquod eorum actioni necesse dare, positionem fidei dignissimam nobis appareret; nec difficilioris cogitationis hanc positionem putamus, quam hoc naturalis philosophiæ axioma, nempe, Actionem et reactionem æqualem esse, et contrariam.

Sed si sistema nervosum ex sanguine vires suas obtinet, conceditur, sanguinem hanc potentiam iis ministrandi acquirere, ex mutationibus quas in pulmonibus subit, ut liquidò patet per defectum sensationis ubi respiratio cohibetur. At in his mutationibus electricitas quæ cum oxygenio absorbetur, cor et vasa sanguifera stimulat; per hæc cum sanguine in cerebrum fertur, ubi forsan aliquo modo mutatur, et iterum ab hoc fonte ad omnes corporis partes per nervos transit; harum partium actiones, et vires particularum repel-

lentes

---

\* Optics, book iii.

lentes ciet ; et in hoc calorem sensilem constare judico ; nam omnes sensationes, et graves, et jucundæ, et molestæ, ex actione particularum primogenarum, vel qualitatum primariarum materiæ oriuntur ; vita ipsa, diversis mutationibus, et viribus, et actionibus materiæ, sustentata est ; et non magis necessarium est fluidum igneum ad producendum calorem sensilem in humano corpore, quam fluidum dolorificum vel fluidum voluptarium ad excitandum dolorem vel voluptatem. Quando vis electricitatis in corpus humanum magis nota et culta erit, multa forsan, quæ nunc propter nostram ignorantiam, ignotâ materiei actione explicamus, ex hoc principio facile oriri conspicientur ; et cum docto Abbatho BERTHOLON, dico, “ J'ai été porté quelque-fois à penser, que les sensations ne sont autre chose qu'une espèce plus légère de commotion électrique ; que les nerfs servent des conducteurs, et que c'est par la circulation rapide de ce feu pénétrant et vivifiant, qu'elles se font toutes.”

Sunt et alia non adhuc notata, quæ nostram de calore animalium theoriam probabiliorrem reddere, tendunt. Imprimis, electrici-

tas stimulus potentissimus est systematis nervosi. Membra paralyti affecta, et diversæ corporis partes aliis morbis torpentes, hoc stimulus subfiliunt, ubi aliis inexcitabiles fuissent. Electricitas est etiam principio vitali faustissima, ut ab experimentis Domini ACHARD discimus, ubi ejus vi, pullos et infecta quædam ab ovis exclusit \*; et ab experimentis aliorum appareat, semina germinare multò citius ubi electrificationi subjecta erant, quam aliter. Postremo, HERBERT †, et VAN SWINDEN, per experimenta probavere, nervos magis electricitati pervios esse, et hanc in eos, vires suas magis exercere, quam in ulla alias corporis partes; nam quando nervum, arteriam, et venam, ex eodem animale comparavere, et ad unam extremitatem utriusque horum phialem Lugdunensem aptavere, dum altera extremitas ad magnum deductorem annexa est, phiala ad quem nervus ducebat, multò quam cæteræ celerius electricitate onusta est.

L

Per

---

\* Observations sur la Physique, tome xx.

† Vide Recueil de Mémoires sur l'Analogie de l'Electricité et du Magnetisme.

Per nostram theoriam, omnes alias res præter animalium calorem, a respiratione pendentes, exponere possumus. De productione aquæ antehac tractavimus; et de evolutione acidi carbonici tantum dicere restat. Hujus excretionem non tam necessariam ad calorem corporis faciendum putamus, quæ ad principium nocivum ejiciendum, ut corpus firmâ valetudine maneat. Excretiones ab omnibus aliis corporis partibus, pulmonibus et hepate exceptis, incombustilibus substantiis, ut aquâ, salibus et terris, inveniuntur constare. Hæc duo organa (viz. pulmones et hepar) combustabilia excernere a natura designari apparent; et hoc in diversis modis faciunt. Nostrâ sententiâ, nulla ratio adeft cur pulmones effec-  
tores animalis caloris faciemus, magis quæ hepar; certè, acidi carbonici, formâ gasis, mera emissio, non sufficit ut tam eximio munere eos ornemus; nam ut in hac forma carbo excerneretur, magna caloris quantitas necessaria est, quæ ejus partibus latens et inclusa a corpore evehitur.

Etiam de modo quo acidum carbonicum gignitur, non cum CRAWFORD et aliis conser-

timus;

timus; nam processum tardum esse, et non ex subito in pulmonibus, vel pendente circulatione perfectum, credimus; sed partitis portionibus pulmonibus ejicitur, quemadmodum productiones aliorum excretionum; paratur etiam acidum carbonicum, non solùm ex oxygenio in pulmones recepto, sed partim conficitur ex decompositione harum substantiarum in ventriculum susceptorum, quæ carbonium cum oxygenio conjunctum habent.

Calor sensilis largè liberatur, quando actioni musculari fortiter utimur: in hoc tempore, SEGUIN et JURINE consumptionem oxygenii majorem esse probavere, quàm dum corpus quiescit. In musculari actione quidquid principium irritabilitatis sustentat, in maxima quantitate consumsimus; at multis experimentis, omnibus optimè notum est, irritabilitatem, non plus respiratione oxygenii, vel oxydi nitrofi Dom. DAVY augeri, quàm e contrario acidi carbonici vel alias gafis impuri respiratione imminuitur.

Luzuriaga, irritabilitatem cordis, et aliorum corporis muscularum, respiratione aëris impuri multùm diminutam et penè destructam, notavit.

notavit \*. Hodierna est philosophorum opinio, asphyxiā effici a submersione vel respiratiōne gasis impuri, deficiente oxygenio stimulo necessario, vel ad excitandam cordis irritabilitatem, et hoc sanguinis stimulo obediens reddendum; vel negato in hoc morbo principio quodam, actioni nervorum apprimè accommodato. De natura hujus principii, tam necessarii ut omnes corporis functiones bene valeant, nostram opinionem tradidimus, nec non quomodo hoc principio calor animalis efficitur exploravimus; et hinc quæ a SEGUIN et JURINE observata fuerunt, facile intelligimus; nam musculari actione irritabilitatem corporis magnoperè expendimus, et ideo majorem copiam hujus principii, quod oxygenio ineſt, et huic irritabilitati subministrat, in corpus recipere exigimus.

NUNC

\* *Dissertatio Inauguralis, De reciproca atque mutua Systematis Sanguinei et Nervosi actione.*

bi a seorsim Crisostomus et Iohannes Mamerius sicut O  
robbet et iste quoq; millesimus iudicat monachos  
et quibusque judeisque dicitur. Ligni mitosq; nichil  
eiusmodi est sed quia ab aliis adhuc dubium est.


NUNC quoniam ut ad finem hanc dissertationem perducamus necesse est ; potestatem corporis animalis calorem suum sustentandi definimus, *constare ex functionibus organorum et fluidorum, quæ, formâ et elementariâ constitutione partium suarum componentium, apta sunt, ad electricitatem, quam ex oxygenio atmosphæræ accipiunt, abstrahendam, secernendam, et insemet cohibendam, eandemque per corpus vivens diffundendam.*

Æqualitas caloris animalium, quicunque sit circumeuntis aëris temperies, tam facile ex hac, quam ex theoria Doctoris CRAWFORD et LAVOISIER, effluit ; nam quando aér frigescit, ab experimentis majorem electricitatis quantitatem continet, etiamque ejus potestas electricitatem deducendi frigore minuta est. Itaque ex aëre frigido electricitatis majorem quantitatem pulmones inhalant, et corpus suam electricitatem eidem parciùs reddit.

Omnia

Omnia argumenta quibus utitur CRAWFORD ad rationem hujus animalium potestatis reddendam, theoriæ suprà traditæ applicari possunt; et quoniam omnibus notæ sunt, de iis filemus.





DISSERTATIO MEDICA

IN VENDELLIA

CINNACHE MALLEA